

অশ্লীলতা নিয়ে অশালীন ডাবনা

অভিজিৎ রায়



হেড লাইন

- ঢাকায় পরিচ্ছন্নতা অভিযান
- চায়না : জানালায় বন্ধুর মুখ
- ফোন প্রতারণা
- ইনডিয়ান মোবাইল ফোন
- দি নিউ ইয়র্ক টাইমস
- ডিজিটাল বনাম ফিল্ম
- প্রেশোত্তর এবং....
- অশ্লীলতা নিয়ে অশালীন ডাবনা
- যুগান্তকারী দুই ঘটনার সঙ্গাহ
- অবহেলিত বিটিভি আর্কাইভ/ সাবেক বিডি চ্যানেলের দুর্ঘটিত

সাপ্তাহিক যায় যায় দিন, ১২ ই এপ্রিল, ২০০৫ সংখ্যা

<http://www.jajaidin.com>

যাযাদির পাতায় ‘অশ্লীলতা’ নিয়ে কিছু লেখার ‘অশালীন’ ইচ্ছেটা আমার পুরোন। প্রতিবারই লিখতে বসে সাত-পাঁচ ভেবে বাদ দিলেও, বলতে বাধা নেই - বছরের এই একটা সময় অশ্লীল ইচ্ছেটা সুনামীর ঢেউয়ের মতই যেন চাগিয়ে ওঠে। কারণটা আর কিছুই নয় - যাযাদির আতি বিখ্যাত স্পেশাল ‘ভালবাসা সংখ্যা’! ব্যাপারটা একটু খুলেই বলি। আমি আমার ঘনিষ্ঠ বন্ধু-বান্ধব আর আত্মীয় স্বজনদের সাথে কথা বলে বুজেছি - শোনা কথা যদিও - এই সংখ্যাটা বেরললে স্কুল-কলেজ গোয়িং কিশোর-কিশোরীদের একটু নাকি বিপদেই পড়তে হয়। কারণ এই ভালবাসা সংখ্যায় সেই চিরায়ত রাবীন্দ্রিক প্লেটোনিক প্রেমের পাশাপাশি স্থান পায় দেহজ প্রেমের রগরগে বর্ণনা। কী নেই ওতে? সুন্দরী বান্ধবীদের সাথে খুনসুটি, ঘটনাঘটি থেকে শুরু করে, ভাবীর সাথে দেবরের, খালাতো বোনের সাথে মামাতো ভাইয়ের, গৃহ পরিচিকার সাথে গৃহকর্তার টক-ঝাল-মিষ্টি সবধরনের সম্পর্কেরই রসালো বর্ণনা থাকে। এবারের সংখ্যায় আবার বোনাস হিসেবে পাঠকেরা পেল এক নামঠিকানাবিহীন পত্রলেখকের তার সৎ-মার সাথে দৈহিক মিলনের ফিরিস্তি। এর মধ্যে কোনটা যে সত্যি আর কোনটা যে মিথ্যা তা একমাত্র ভবিতব্যই জানে! কারণ ওই গল্প লিখিয়েদের মধ্যে সত্যিকারের ‘ছ্যাকা খাওয়া মজু’ থেকে শুরু করে পর পর তিনবার হ্যাটরিক করা পেশাদার ভ্যালেন্টাইন লেখক সকলেই আছেন!

তবে কথা সেটা নয়। কথা হচ্ছে, ভালবাসা সংখ্যাটা নাকি পারিবারিকভাবে ‘একসাথে’ পড়া যায় না! শুনেছি, বাবা কখনও পড়তে থাকলে ছেলে লজ্জা পেয়ে অন্য ঘরে পালিয়ে যায়, আর ছেলে পড়তে থাকলে বাবা নাকি না দেখার ভান করে মাথা চুলকোতে থাকেন, কিংবা জানালা খুলে প্রকৃতির মোহময় রূপ দর্শনে ব্যস্ত হয়ে যান। আমার এক বন্ধুর কথা বলি। সেই বন্ধুটি তার এক আত্মীয়ের বাসায় একদিন বেড়াতে গিয়ে দেখল, সেই বাড়ীর ছোট ছেলেটিকে নীল-ডাউন করে দেওয়ালের সামনে দাঁড় করিয়ে রাখা হয়েছে। বন্ধু তো অবাক! পরে ঘটনা জানা গেল - ছেলেটি নাকি তার বড় ভাইয়ের ড্রয়ার খুলে প্রাপ্ত বয়স্কদের বই - মানে ‘যাযাদি ভালবাসা সংখ্যা’ চুরি করে লুকিয়ে পড়তে শুরু করেছিল। আর তাই তার ঘাড়ে এহেন এহেন মর্মান্তিক শাস্তি! ছেলেটির মা আবার আমার বন্ধুটির কৌতুহলী মনকে নিবৃত্ত করতে শোনাতে শুরু করল বছ

ব্যবহারে জীর্ণ হয়ে যাওয়া নৈতিকতার বাণী গুলো - ‘বুঝলে বাবা, কী যে সব দিনকাল পড়েছে; আজকাল দেখি শুধু অশ্লীল বই পড়ব। কি সব ছাই-পাশ ছাপিয়ে কচি কচি বাচ্চাগুলোর মাথা নষ্ট করছে- আমাদের সময় আমরা পড়তাম শরৎচন্দ্র, রবীন্দ্রনাথ; আর আজ ...’

বন্ধুটি বাড়ী এসে আমায় বলল, তুই তো লেখালিখি করিস। এ নিয়ে তোর ভাবনা-টাবনা গুলো কিরকম? আমিও ভাবলাম এই সুযোগে কিছু লিখে ফেলি না কেন - ‘অশ্লীলতা’ নিয়ে আমার এতদিনকার আশালীন ভাবনাগুলোও পাঠকদের একটু জানানো দরকার। তাই এবার আর ফাঁকিবাজি নয় -সত্যিকার অর্থেই কলম- খুড়ি কি-বোর্ড হাতে তুলে নেওয়া। লেখার আগে একটু ভদ্রতাও করে নেই - আমার বক্তব্যের সাথে হয়ত সবাই একমত হবে না, তবু আমার বক্তব্য যদি পাঠকদের কিছুটা হলেও চিন্তার খোরাক জোগায়, তবেই এই লেখার সার্থকতা।

প্রথমেই বলে রাখি যে, শ্লীলতা-অশ্লীলতা শব্দ দুটির কোন সঠিক এবং গ্রহনযোগ্য ব্যাখ্যা ও বিশ্লেষণ কেউ করেছেন বলে আমার জানা নেই। যে ‘অশ্লীলতা’ প্রতিনিয়ত জাতীয় স্বার্থে, তরুণ-তরুণী এবং কিশোর-কিশোরীর চরিত্রে আঘাত করছে বলে দাবী করা হচ্ছে তার কি কোন সার্বজনীন সংজ্ঞা পাওয়া যাচ্ছে? অশ্লীলতার সংজ্ঞাই বা কি? কোন সাহিত্য বা শিল্পকলা ‘শ্লীল নাকি অশ্লীল’ তা বুঝবার উপায় কি, তার রূপ বা বিচারের মাপকাঠিই বা কি? কে এটি নির্ধারণ করবে, আর কিভাবেই বা করবে?

আসলে সত্যি বলতে কি অশ্লীলতার কোন সার্বজনীন সংজ্ঞা, পরিচয় বা বিবরণ নেই। দেশ বিদেশের বহু স্বনামধন্য শিল্পীর শিল্প কর্ম, সাহিত্যিকদের সাহিত্যকর্ম বিভিন্ন যুগে ‘অশ্লীলতার অভিযোগে’ কাঠগড়ায় নিয়ে হেনস্তা করা হয়েছে, নিষিদ্ধ বলে ঘোষণা করা হয়েছে। আবার বহু বছর নিষিদ্ধ থাকার পর রাষ্ট্রীয় আদালতই আবার মনে করেছে সেই নিষিদ্ধ ঘোষিত সাহিত্যকর্মটি আসলে মোটেই অশ্লীল নয় - এমন উদাহরণও বিরল নয়। ভারতে সমরেশ মজুমদারের ‘প্রজাপতি’ বইটির নিষিদ্ধকরণ আর তারপর আবার তার নিষিদ্ধদেশ প্রত্যাহারের ব্যাপারটি এমনি একটি উদাহরণ। আমার মনে আছে আমি আর আমার বন্ধুরা যখন স্কুলজীবনে কাজী আনোয়ার হোসেনের ‘মাসুদ রানা’ পড়তাম, তখন তা আমাদের বাবা-মাকে জানতে দিতে চাইতাম না। সহজ বাংলায় বললে, লুকিয়ে লুকিয়ে পড়তাম। কারণ, সেসময় আভিভাবক মহলে মাসুদ রানা অশ্লীল বই হিসেবে বিবেচিত হত। কিন্তু যখন বড় হলাম, তখন বুঝলাম, অশ্লীলতা নামে পুরো বিষয়টিই আসলে আপেক্ষিক। D. H Lawrence এর ভাষায় - ‘What is pornography to one man is the laughter or genius to another’ - এ খুবই সত্যি কথা। একদিনকার ঘটনা বলি। হুমায়ূন আজাদের ‘ছাপান্ন হাজার বর্গমাইল’ তখন সবেমাত্র বাজারে বেরিয়েছে। একটি দৈনিক পত্রিকা তার একটি উপসম্পাদকিয়তে বইটির বেশ কিছু অংশ উল্লেখ করে অশ্লীলতার অভিযোগ করেছিল। যথারীতি বিষয়টি আমার বন্ধু মহলে আলোচনায় ঝড় তুলল। আমার বাল্যবন্ধু এষণ তো বলেই বসল, ‘আমার কাছে কিন্তু বইটি একেবারেই অশ্লীল বলে মনে হয়নি। ডঃ আজাদ যে বিষয়গুলো বইয়ে উল্লেখ করেছেন, তা তো বাংলাদেশে প্রতিনিয়ত ঘটে চলেছে। এগুলো উল্লেখ করা অশ্লীল হবে কেন?’ ঠিক একই ব্যাপার দেখছি আজ বিভিন্ন তরুণ লেখকদের লেখার ক্ষেত্রে। যে লেখকদের সাম্প্রতিক লেখাগুলো আমাদের গুরুজনদের কাছে ‘অশ্লীল’ বলে মনে হচ্ছে, অনেকের কাছেই কিন্তু তা মোটেও সেরকম মনে হয়না। সম্ভবত অশ্লীলতা বিষয়টিই আসলে আপেক্ষিক।

ইতিহাসের দিকে তাকানো যাক। যখন কালী প্রসন্ন সিংহ প্রথম চলতি ভাষায় ‘হুতোম প্যাঁচার নক্সা’ লিখেছিলেন, তখন অনেকের কাছেই তা অশ্লীল ঠেকেছিল। এমনকি বঙ্কিমচন্দ্রের মত ঔপন্যাসিক

অশ্লীলতার অভিযোগে বইটিকে নিষিদ্ধ করবার পক্ষে মত দিয়েছিলেন। কারণ, চলতি ভাষায় লেখা এ বই নাকি পিতা-পুত্র একসাথে বসে পাঠ করার মত নয়! অথচ আজ আমরা জানি চলতি ভাষাই আজ লিখবার জনপ্রিয় মাধ্যমে পরিনত হয়েছে। কালের পরিবর্তনের সাথে সাথে তা হলে অশ্লীলতার ধারণাও পালটায়। পাঠক-পাঠিকাদের অনেকেই আজ জেনে অবাক হবেন যে, শরৎচন্দ্র আর রবীন্দ্রনাথের অনেক কালজয়ী ‘নির্দোষ’ লেখার বিরুদ্ধেও একসময় অশ্লীলতার গুরুতর অভিযোগ আনা হয়েছিল। আজ যেমনটি আনা হচ্ছে হুমায়ূন আজাদ, তসলিমা বা ইমদাদুল হক মিলনদের লেখার ক্ষেত্রে, অথবা আরও ক্ষুদ্র প্রেক্ষাপটে যাযাদির বিভিন্ন লেখকদের লেখার ক্ষেত্রে। শফিকুর রহমান তার পার্থিব সমাজ গ্রন্থে এ প্রসঙ্গে বলেছেন, ‘মনস্তাত্ত্বিক গল্প বা উপন্যাস অশ্লীল বলে যারা ইতোপূর্বে শরৎচন্দ্র বা রবীন্দ্রনাথের বিরুদ্ধে অভিযোগ দাঁড় করিয়েছিলেন তাদের কি আজ পুনর্জন্ম হয়েছে? না তাঁদের প্রেতাত্মা কারো উপরে ভর করেছে? কিন্তু আমরা জানি যে, অশ্লীল, *thirdrate*, *bastard culture* এর স্রষ্টা শরৎচন্দ্র আর রবীন্দ্রনাথেরই জয় হয়েছিল। তরুন যুব-সমাজকে নৈতিক চরিত্র থেকে বিচ্যুত করে বিপথে তথা ধবংসের পথে ঠেলে দেওয়ার অভিযোগ বেশীদিন ধোপে টেকেনি।’

বাংলাদেশে অনেক অভিভাবকই তাদের প্রথাগত চিন্তাধারায় মনে করেন তসলিমা, মিলন বা হুমায়ূন প্রমুখ জনপ্রিয় লেখকদের লেখা নিম্নমান সম্পন্ন এবং অশ্লীলতায় পরিপূর্ণ। অনেকেই তাদের সন্তানদের হাতে এদের লেখা বই তুলে দিতে কুণ্ঠিত বোধ করেন। আমার জানাশোনা অনেক ভদ্রসন্তানেরা এসব ‘কুরূচিপূর্ণ’ বই লুকিয়ে পড়ে থাকে কারণ অভিভাবকরা জেনে ফেললে ‘খারাপ মনে করবে’! সনাতন চিন্তাধারার অনেক অভিভাবকই মনে করেন শিশুদের ছোটবেলা থেকে ধর্মীয় শিক্ষায় শিক্ষিত করলে তাদের ছেলেরা বোধ হয় চরিত্রবান হিসেবে গড়ে উঠবে। ফলে তারা তাদের সন্তানদের হাতে তুলে দেন ধর্মীয় ভাবাবেগ সমৃদ্ধ ‘রূচিশীল’ বই। কিন্তু যে ধর্মগ্রন্থগুলোকে শিশুদের নৈতিক চরিত্র গঠনের চাবিকাঠি বলে মনে করা হয় তাদের অনেকগুলিই কিন্তু ঈশ্বর-ভগবান-দেব-দেবী-পয়গম্বরদের অশ্লীল জীবনকাহিনীতে পরিপূর্ণ। হিন্দু পুরান, গ্রীক পুরান, তাওরাতের মত কিতাবেই তথাকথিত ‘অশ্লীলতার’ জলজ্যন্ত উপকরণ রয়েছে। বাংলাদেশের অনেক সচেতন পাঠকই মনে করেন সত্যই যদি অশ্লীলতার অভিযোগে কোন বইকে নিষিদ্ধ করতে হয়, তবে তা হওয়া উচিত মৌলানা গোলাম রহমান রচিত বহুল প্রচারিত ‘মকসুদুল মোমেনীন’। Oscar Wild তার *picture of Dorton Gray* বইয়ের ভূমিকায় একটি মজার উক্তি করেছেন; তিনি বলেছেন, *there was actually nothing as a moral or immoral (obscene) book, books were either well-written or badly written.* মানে শ্লীল বা অশ্লীল বই বলে আসলে কিছু নেই - বই হয় সুলিখিত, না হয় কুলিখিত।

অনেক অভিভাবকই আছেন যারা মনে করেন Sex নিয়ে আলোচনা করাটাই আশ্লীল। অথচ সব সমাজবিজ্ঞানীই আজ একমত যে, যৌনতাকে বাদ দিয়ে পরিপূর্ণ জীবন সম্ভব নয়। মানুষের জীবনে ক্ষণিবৃত্তি আর আর যৌনবৃত্তিই প্রধান। আমাদের পার্থিব জগৎ তো ইন্দ্রিয়াতীত নয়। অতীন্দ্রিয়তার স্থান এ জগতে বডড কম। অথচ আমাদের সমাজে ইন্দ্রিয়তার চর্চাকেই পাপ মনে করা হয়ে থাকে। অথচ যারা এরকম মনে করেন, তারাও কিন্তু নিজেদের জীবনে Sex কে প্রাধান্য দিয়ে থাকেন। আমাদের দেশের অভিভাবকদের এ ধরনের আত্ম-প্রবঞ্চনা আর স্ববিরোধিতার কারণে একটি শিশু কোন যথার্থ Sex education নিয়ে কখনই বেড়ে উঠে না। Sex সম্বন্ধে সে অসম্পূর্ণ ধারণা পায় কৈশরে তাদের বন্ধুদের কাছ থেকে আর কৌতুহল মেটায় নীলক্ষেত থেকে কেনা বা বন্ধুদের কাছ থেকে ধার করা ‘রসময় গুপ্ত’ জাতীয় ভুল তথ্য সমৃদ্ধ বইগুলো থেকে। যৌনতার ব্যাপারে জাতি হিসেবে আমরা যে কতটা আত্ম-প্রবঞ্চক তার নমুনা পাওয়া যাবে আমাদের (বাংলা বা হিন্দি) সিনেমাগুলো বিশ্লেষণ করলে। কাহিনীর প্রয়োজনে

আসা প্রেমিক-প্রেমিকার অথবা স্বামী-স্ত্রীর একটি সুন্দর চুম্বন দৃশ্য ‘অশ্লীল’ বলে পরিগণিত হয়, কিন্তু বৃষ্টির জলে সিঁকে-বসনা নারীর অকারণ এবং উত্তেজক লক্ষ-ঝঙ্কার দৃশ্য আর কুৎসিত অংগভঙ্গি অবলীলায় সেনসর বোর্ডের ছাড়পত্র পেয়ে যায়!

পৃথিবীর কোন জায়গায় অশ্লীলতা নেই? আশ্লীলতা খুঁজতে চাইলে সব জায়গাতেই কম-বেশী তা পাওয়া যাবে। বার্নার্ড শ তাই যথার্থই বলেছেন। ‘Obscenity can be found in every book except telephone directory’। আমাদের নিত্য-নৈমন্তিক দিনগুলোতে ঘটে যাওয়া উপকরণকে লিপিবদ্ধ করা নিশ্চয়ই অন্যায্য নয়। যেমন, হুমায়ূন আজাদের ‘পাক সার জমিন সাদ বাদ’ উপন্যাসটির কথা ধরা যাক। অনেক ‘সুস্থ রুচির’ পাঠকদের সাথে আমি কথা বলে দেখেছি উপন্যাসটি তাদের কাছে শুধু ‘অশ্লীল’ নয়, রীতিমত ‘পর্ণোগ্রাফি’, বিকৃত। আবার অনেক রাজনীতি-সচেতন লোকজনের কাছেই এটি অশ্লীল তো নয়ই বরং ‘রুঢ় বাস্তবতা’। হুমায়ূন আজাদকে এ সম্বন্ধে জিজ্ঞাসা করা হলে তিনি স্পষ্টভাবে বলেছিলেন -

‘এখন যারা ধর্ষণ করে তারাও কাম চরিতার্থ করার জন্য ধর্ষণ করে না। ধর্ষণ এখন তাদের কাছে রাজনীতি। কাজেই এ উপন্যাসে যে যৌনতা রয়েছে সেটি আছে ফ্যাসিবাদী রাজনীতির প্রতীকরূপে, ...। লাম্পট্য এখানে প্রাত্যহিক ব্যাপার, কিন্তু তা লিখলে চরম লাম্পটও নিষ্কাম সাধু হয়ে নিন্দা করে। ভন্ডামো আমাদের জাতীয় চরিত্র।’

(ভন্ডামোর ব্যাপারটি শুধু বাংলাদেশেই সীমাবদ্ধ নয়, সীমানা ছাড়িয়ে চলে গেছে ভারতেও। সম্প্রতি এক ‘রুচিশীল’ আবসরপ্রাপ্ত পুলিশ অফিসার মামলা করেছে সুনীল গঙ্গোপাধ্যায়ের বিরুদ্ধে। অপরাধ গুরুতর! ‘দেবী সরস্বতী’কে অবমাননা! আরাধ্য দেবী আফটার অল! ‘বিকৃতমনা’ সুনীলের কাজে-কর্মে ‘রুচিশীল’ পুলিশের ধর্মানুভূতিতে তো লাগবেই!)

আবার তসলিমার এই নীচের ‘নিয়তি’ কবিতাটি পড়া যাক :

প্রতিরাতে আমার বিছানায় এসে শোয় এক নপুংসক পুরুষ।
চোখে
ঠোঁটে
চিবুকে উন্মাতাল চুমু খেতে খেতে
দু’হাতে মুঠো করে ধরে স্তন।
মুখে পোরে, চোষে।
তৃষ্ণায় আমার রোমকূপ জেগে ওঠে
এক সমুদ্র জল চায়, কাতরায়।.... ..

শিয়রে পৌষের পূর্ণিমা
রাত জেগে বসে থাকে, তার কোলে মাথা রেখে
আমাকে উত্তপ্ত ক’রে
আমাকে আগুন ক’রে
নপুংসক বেঘোরে ঘুমায়।

আমার পুরো শরীরটা তখন তীব্র তৃষ্ণায়
ঘুমন্ত পুরুষটির স্থবির শরীর ছুঁয়ে
এক ফোঁটা জল চায়, কাঁদে।

কবিতাটি কি অশ্লীল? আমার প্রায় সকল বন্ধু-বান্ধবই তাই মনে করেন। কারণ, তাদের মনে হয়েছে এভাবে ‘স্তন’, ‘চোষা’, ‘নপুংশক’ শব্দগুলো ব্যবহৃত হয়েছে তা নাকি শালীন নয়। কিন্তু আমার কাছে পুরো কবিতাটি উঠে এসেছে এক যৌন-অবদমিত অতৃপ্ত নারীর ব্যথাতুর জীবন-নাট্য হিসেবে। এখানে ব্যক্তি তসলিমা কে বা কেমন তা আমার জানার কোন প্রয়োজন নেই। আমার ভাবনা কেবল কবিতাটি নিয়ে। শব্দ চয়ন হয়ত অতিমাত্রায় বিপ্লবাত্মক মনে হতে পারে, কিন্তু বিষয়বস্তুকে তো অস্বীকার করার জো নেই। আর তা ছাড়া ‘স্তন’, ‘চোষা’, ‘নপুংশক’-এর উপর দোষ চাপালেও তসলিমার অনেক কবিতায় ওগুলো না থাকলেও তারা ‘অশ্লীল’ মনে করেন। যেমন নীচের কবিতাটি -

তিরিশে নাকি কমতে থাকে ভালবাসার শীত
আমার দেখি তিরিশোর্ধ শরীর বিপরীত।

তিরিশোর্ধ শরীরখানা কাঁপে
তরবারি কি আছে যুবক তরবারির খাপে?

উপরের লাইনগুলোতে তো ‘স্তন’, ‘চোষা’ এই শব্দগুলো নেই। তারপরেও আমার বন্ধুরা মনে করে ওটা অশ্লীল। আমি জিজ্ঞেস করি, ‘কেন’? উত্তর পাই ভঙ্গিটা নাকি অশ্লীল। ‘তরবারি কি আছে যুবক তরবারির খাপে’ - এটার মধ্যে একটা অশ্লীল গন্ধ আছে।

আমি এক ওয়েব-সাইটে লিখতাম। সেখানকার এক লেখক তার এক লেখায় গাউসিয়া মার্কেটে ভীরের মধ্যে মেয়েদের বুকে হাত দেওয়ার বর্ণনা করেছিলেন। অনেক ‘রুচিশীল’ পাঠকই তখন ওটিতে ‘অশ্লীলতার’ গন্ধ পেয়েছিলেন, অথচ আমার কাছে মনে হয়েছিল লেখকের বর্ণিত কাহিনীটি মেয়েদের জীবনের এক নিষ্ঠুর বাস্তবতার কাহিনী। বাংলাদেশে এমন কোন মেয়ে পাওয়া যাবে কিনা সন্দেহ যে তার জীবনের কোন না কোন সময়ে পুরুষদের এ ধরনের নোংরামির স্বীকার হয়নি। শুধু গাউসিয়া কেন, একুশের বইমেলা, বৈশাখী মেলা, কনসার্ট থেকে শুরু করে সর্বত্রই ভীড়-ভাটটার মধ্যে একদল লোক ওৎ পেতে বসে থাকে সহজলভ্য শিকারের আশায়। যারা এগুলো করছে তাদের অনেকেই কিন্তু বিশ্ববিদ্যালয়ে পড়ুয়া মেধাবী ছাত্র। বোঝাই যায়, ছোটবেলা থেকে কোন Sex education না পাওয়া আর বিকৃত যৌনাচারের চর্চাই তাদের ধীরে ধীরে এ দিকে নিয়ে যাচ্ছে। অনেকে এ সব ঘটনার পেছনে আবার মূল বিষয়টা এড়িয়ে নারীদের পোশাক-আশাকের বিষয়টাকে অধিকতর প্রাধান্য দিয়ে থাকেন। ‘শরীয়ত মোতাবেক’ কাপড়-চোপড় পড়লে এ ধরনের ঘটনা কমে যাবে বলে তাদের ধারণা। কিন্তু আমি দীর্ঘদিন ধরে এই সিঙ্গাপুরে থেকে দেখেছি, এখানে স্বল্প বসনের কারণে এখানে কেউ দৈহিকভাবে নিগৃহীত হচ্ছে না। যথার্থ Sex education নিয়ে গড়ে উঠলে পোশাকের ব্যাপারটা আসলেই গৌন হয়ে যায়।

যা হোক, আমার এই প্রবন্ধটি শেষ করছি এখানে। তার আগে কবিগুরু আর বিদ্রোহী কবির দুটি ‘অশ্লীল’ কবিতার অংশবিশেষ। হয়ত পাঠক/পাঠিকাদের ভাল লাগবে।

‘প্রতি অংগ কাঁদে মোর প্রতি অংগ তরে,
প্রাণের মিলন মাগে দেহের মিলন;
হৃদয় আচ্ছন্ন দেহ হৃদয়ের ভরে
মুরছি পড়িতে চায় তব দেহ পরে।
তোমার নয়ন পানে ধাইছে নয়ন,
অধর মরিতে চায় তোমার অধরে’ (দেহ মিলন - রবীন্দ্রনাথ ঠাকুর)

‘যেদিন স্রষ্টা বৃকে জেগেছিল আদি সৃষ্টি কাম,
সেদিন স্রষ্টা সাথে তুমি এলে আমি আসিলাম।
আমি কাম, তুমি হলে রতি
তরুণ-তরুণী বৃকে তাই আমাদের অপরূপ গতি!’ (নজরুল)

পাঠকদের সুসাস্থ্য কামনা করছি।

অভিজিৎ রায়
charbak_bd@yahoo.com